

# Jaya ke pengajian perubatan NUS



Foto KHALID BABA

MESKIPUN berbeza latar belakang, impian mereka semuanya sama.

Lima anak muda ini bakal bergelar mahasiswa di Sekolah Perubatan Yong Loo Lin Universiti Nasional Singapura (NUS).

Usaha dan kerja keras adalah kunci kejayaan bagi pelajar (*dari kiri*) Cik Norhashirin M Norman, Cik Aqilah Faaiah Shamsuri, Cik Aqilah Dariah Mohd Zulkarnain, Cik Isrin Farhana Anwardeen dan Encik Sheikh Izzat Zainal-Abidin Bahajjaj.

Mereka berkongsi cita-cita yang sama mahu membantu rakyat Singapura dalam bidang perubatan.

Harapan mereka adalah supaya belia Singapura akan sentiasa bersemangat dan melakukan yang terbaik dalam mengejar impian mereka.

Semester pertama bermula pada 14 Ogos ini dan mereka bakal meraih segulung ijazah lima tahun kemudian.

Laporan lanjut di Muka 16.

Lima pelajar bakal melanjutkan pelajaran mereka di Sekolah Perubatan Yong Loo Lin Universiti Nasional Singapura bulan ini. SITI NUR 'ALIAH GHAZALI (sghazali@sph.com.sg) dan AINUN MARDIAH MOHSIN (smohsin@sph.com.sg) melaporkan.

# Barah ibu dorong impian jadi doktor

TIDAK dinafikan tidak ramai pelajar politeknik yang berjaya melanjutkan pelajaran di Sekolah Perubatan Yong Loo Lin Universiti Nasional Singapura (NUS).

Namun, Cik Aqilah Faaiah Shamsuri, 21 tahun, berjaya membuktikan sebaliknya.

Gadis muda ini berjaya meraih purata gred kumulatif (CGPA) 3.98 di Politeknik Republic dalam jurusan sains biomedikal.

"Saya bersyukur sekali kerana diberi peluang melanjutkan pelajaran saya di NUS. Selain itu, saya rasakan seperti segala kerja keras saya berbaloi selama ini."

"Saya juga dapat membuktikan kepada orang lain bahawa pelajar politeknik juga mampu memasuki bidang perubatan walaupun perjalanannya lebih susah," kata Cik Aqilah Faaiah.

Pada 2014, Cik Aqilah Faaiah yang mengikut ibu bapanya bermastautin di Dubai, Emiriah Arab Bersatu, ketika berumur 10 tahun telah mengambil keputusan melanjutkan pelajarannya di Singapura.

"Setelah pulang ke Singapura, ibu bapa saya berpesan bahawa saya harus kuat berusaha dan bekerja keras."

"Pelajar di Singapura kuat berdaya saing dan ini berbeza di Dubai yang pelajarinya harus sentiasa memotivasi diri sendiri," ujar beliau.

Menyingskap kembali tentang kenangan beliau selama bergelar pelajar di Politeknik Republic, Cik Aqilah Faaiah berkata:

"Pada tahun kedua politeknik, saya telah memikul beberapa jawatan tinggi di persatuan sekolah saya."

"Ini membuat saya lebih fokus kepada persatuan tersebut berbanding pelajaran saya. Namun, apa yang saya dapati ialah betapa pentingnya seseorang tahu akan cara pembelajaran yang paling sesuai buat dirinya."

Menurut beliau, pembelajaran baginya berlaku di dalam kelas apabila beliau akan memastikan sebelum tamat sesebuah kelas, setiap soalan di mindanya akan terjawab.

Pada tahun lalu, ibu Cik Aqilah Faaiah telah didiagnosis dengan penyakit barah ovari dan rahim. Ini mendorong beliau merealisasikan impiannya sejak kecil mahu menjadi seorang doktor.

"Pada saya, sebagai seorang doktor, kita bukan sahaja dapat memberi sokongan kepada pesakit malah ia juga disertakan dengan ilmu perubatan yang kukuh," katanya.

Beliau yang belum pasti lagi bidang kedokteran yang ingin didalaminya berkata salah satu bidang yang menarik minatnya adalah sebagai pakar sakit puan.

"Saya pernah dinasihati bahawa jika saya ingin menjadi seorang doktor, saya harus melakukannya dengan hati yang murni. Seorang doktor itu harus memikirkan tentang keperluan pesakitnya sebelum kemahuaannya sendiri," katanya.

Cik Aqilah Faaiah juga menasihati mereka yang melalui perjalanan pelajaran yang lebih jauh berbanding yang lain supaya sentiasa fokus kepada matlamat mereka dan bekerja keras demi mencapainya.



KATA-KATA IBU BAPA PEMBAKAR SEMANGAT: Setelah pulang ke Singapura untuk melanjutkan pelajarannya, Cik Aqilah Faaiah Shamsuri diingatkan oleh ibu bapanya bahawa untuk berjaya di Singapura, seseorang harus sentiasa bekerja keras. - Foto: FOTOKHALID BABA

## 'Penuntut terpilih merupakan antara yang terbaik'

MENDAPAT tempat dalam pengajian perubatan di universiti tempatan bukan satu proses mudah dan bakal pelajar perlu menjalani proses pemilihan yang ketat.

Tiga doktor yang diinterview *Berita Harian* berpendapat bahawa mereka yang diterima amat bertuah kerana merupakan antara yang terbaik.

Pakar jantung Dr Abdul Razak Omar yang sudah lebih 20 tahun berkhidmat dalam bidang perubatan berkata: "Dedikasi dan pengorbanan perlu bagi seorang doktor. Selain itu, kejayaan sebagai seorang doktor adalah sebuah proses pembelajaran sepanjang hayat."

Menurut Dr Elly Sabrina Ismail pula, ia merupakan pencapaian besar bagi yang diterima ke dalam bidang perubatan dan mereka harus menepuhi banyak proses mencabar.

"Selain perlu mendapat markah yang baik, mereka harus melalui proses pemilihan dengan sesi temu duga dan juga ujian yang lain."

"Untuk menjadi seorang doktor, seseorang harus mempunyai semangat dan daya tahan yang jitu," kata beliau.

Presiden Persatuan Karyawan Penjagaan Kesihatan Islam (MHPA), Dr Zuraimi Mohamed Dahlan, berkata: "Tidak semua yang menjalani ujian untuk masuk ke dalam bidang perubatan akan lulus, jadi tahniah bagi mereka."



BERAZAM MAHU SENTIASA MEMBANTU: Cik Aqilah Dariah Mohd Zulkarnain ingin menjadi doktor supaya dapat membantu keluarga tercinta dan orang di sekelilingnya.

## Minat jadi pakar sakit puan

BAGI Cik Aqilah Dariah Mohd Zulkarnain, beliau berazam syukur kerana bakal melanjutkan pelajarannya di Universiti Nasional Singapura (NUS) dalam jurusan perubatan.

Gadis berumur 19 tahun ini tidak menafikan bahawa tidaklah mudah diterima masuk ke Sekolah Perubatan Yong Loo Lin NUS.

"Perjalanan saya baru sahaja bermula dan tidak saya nafikan bahawa ia pastinya perjalanan yang sukar sekali. Namun, saya berasa gembira kerana telah mengambil keputusan melanjutkan pelajaran dalam jurusan perubatan."

"Ia bukan keputusan yang mudah dan saya mengambil masa yang lama menerima tawaran yang diberi," ujar beliau.

Cik Aqilah Dariah, yang pernah dinobatkan sebagai pelajar Melayu terbaik bagi keputusan Peperiksaan Tamat Sekolah Rendah (PSLE), mengekalkan prestasi yang baik sepanjang bergelar pelajar di Sekolah Perempuan Raffles dan Raffles Institution (Tahun 5-6).

Namun, beliau tidak menafikan ketika berada di tahun 5 di Raffles Institution, beliau harus bijak mengimbangi masa antara pelajaran dengan kegiatan sukan iaitu bola sepak.

"Ketika saya berada di tahun 5, keputusan peperiksaan saya tidak berapa memuaskan pada permulaannya. Saya belum terbiasa mengimbangi masa antara pelajaran dengan kegiatan lain. Namun begitu, saya mengajar diri sendiri berdisiplin dan harus bijak mengutamakan mana yang lebih penting," katanya.


Impian Cik Aqilah Dariah mahu menjadi seorang doktor didorong oleh keinginan beliau membantu keluarga tercinta dan orang di sekelilingnya.

"Saya lihat ramai orang di sekeliling saya yang berpenyakit seperti penyakit kencing manis dan saya ingin melakukan sesuatu untuk membantu. Jika saya menjadi seorang doktor, saya pasti dapat menasihati mereka," kata anak bongsu dua beradik itu.

Apabila ditanyakan tentang bidang kedokteran yang ingin beliau dalam, Cik Aqilah Dariah berkata: "Saya berminat menjadi seorang pakar sakit puan atau seorang doktor keluarga."

"Saya rasakan bahawa lebih ramai wanita akan berasa selesa jika adanya lebih ramai pakar sakit puan wanita."

"Selain itu juga, saya selesa dengan keadaan di dalam sebuah klinik keluarga. Saya gemar berinteraksi dengan ibu bapa dan anak mereka."



MINAT BIDANG KEDOKTORAN: Setelah meraih ijazah kejuruan kelas pertama muda radiografi di Universiti Monash, Cik Norhashirin sedar minat beliau adalah merawat pesakit.

## Kini kejar ijazah kedua

PERTAMA kali bertemu dengan gadis muda ini, pasti ramai tidak akan percaya beliau berumur 24 tahun. Bukan itu sahaja, beliau sudah berjaya meraih segulung ijazah sarjana muda kejuruan kelas pertama dalam jurusan radiografi di Universiti Monash, Australia.

Mulai dari situ, beliau mula menyedari bahawa minatnya adalah dalam mendiagnosis dan merawat pesakit.

Cik Norhashirin M Norman ingin melakukan lebih daripada hanya merekod imej struktur dalaman badan seseorang pesakit.

Oleh itu, beliau membuat keputusan mengambil ijazah sarjana muda kedua beliau dalam jurusan perubatan di Sekolah Perubatan Yong Loo Lin Universiti Nasional Singapura (NUS).

"Ibu saya, Cik Hasnani Kasim, sering berpesan bahawa jika kita bekerja keras, sistem pendidikan Singapura yang berlandaskan prinsip meritokrasi pasti akan membantu kita mencapai matlamat kita," katanya.

Bagi Cik Norhashirin, kerja keras adalah penting jika seseorang ingin berjaya. Selain itu, keadaan sekeliling yang baik juga dapat membantu seorang pelajar ketika mengulang kaji.

"Saya bersyukur ibu bapa saya sentiasa memberi sokongan. Ia juga amat penting bagi seseorang itu mencari cara pembelajaran paling berkesan," tambah beliau.

Menyingskap kembali kenangan ketika menuntut di Universiti Monash, Cik Norhashirin berkata: "Selama tiga tahun berada di Melbourne, saya tidak dapat menyambut Hari Raya Aidilfitri di Singapura. Ini membuatkan saya berasa amat rindu kepada keluarga di Singapura."

"Namun begitu, saya bersyukur kerana mempunyai sistem sokongan yang kuat daripada keluarga dan juga sahabat baik di Singapura mahupun Melbourne."

Apabila ditanyakan tentang bidang kedokteran yang ingin didalaminya, Cik Norhashirin masih belum pasti. Namun, beliau berkata akan mendalami bidang kedokteran yang memerlukan lebih ramai pakar terutamanya dalam konteks Singapura.

"Saya ingin membantu dalam bidang penyelidikan perubatan dan sambil itu mengetahui apa yang masyarakat perlukan daripada segi perubatan," katanya.

Cik Norhashirin juga berkata: "Saya percaya bahawa setiap orang mempunyai impian mereka sendiri."

"Mereka harus berani mengejar impian, bekerja keras dengan minda yang positif dan selalu berdoa untuk yang terbaik."



PEMBELAJARAN SEPANJANG HAYAT: Ibu Cik Isrin Farhana merupakan sumber inspirasi beliau untuk terus belajar dan merealisasikan impiannya menjadi seorang doktor.

## Ibu, doktor famili sumber inspirasi

PERASAAN gembira dan bersyukur Cik Isrin Farhana Anwardeen tidak dapat disembunyikan apabila beliau mendapat keputusan diterima masuk Sekolah Perubatan Yong Loo Lin Universiti Nasional Singapura (NUS).

Sejak dahulu lagi, beliau bercita-cita menjadi doktor. Sokongan keluarga yang tidak henti dan yang memberinya ruang memilih bidang yang ingin diceburi banyak membantu gadis tersebut.

"Penerimaan saya di NUS merupakan satu langkah dekat dengan impian saya. Sewaktu saya di menengah empat, saya selalu mendapat gred A akan tetapi pada awalnya di Raffles Institution (Tahun 5-6), saya mendapat gred C."

"Saya berasa kurang semangat pada waktu itu biarpun saya telah belajar bersungguh-sungguh. Waktu itu saya masih kurang yakin dengan diri sendiri," kata bekas pelajar Sekolah Menengah Commonwealth berusia 19 tahun itu.

Semasa tahun kedua di Raffles Institution, beliau belajar bersungguh-sungguh setelah membuang segala pemikiran negatif. Beliau memulakan persediaan awal bagi peperiksaan GCE peringkat 'A'.

Menurutnya, beliau mula belajar daripada selepas kelas hingga 9 malam setiap hari.

"Semua orang di sekolah juga akan belajar, saya akan rasa bersalah jika pulang awal apabila kawan yang lain sedang sibuk belajar," katanya sambil ketawa.

Terdapat dua orang yang memberikannya inspirasi. Pertama ibunya sendiri, Cik Rejija Banu.

"Ibu saya hanya dapat bersekolah hingga beliau berusia 12 tahun. Beliau mempunyai cita-cita agar saya masuk ke universiti," ujar beliau.

Hal itu telah membuatnya ingin menjadi doktor dan mahu memenuhi impian ibunya.


Selain itu, beliau ingin menjadi seperti doktor keluarga yang sering dikunjungnya dan keluarganya dahulu.

"Doktor tersebut sangat baik dan membuatkan kami berasa selesa seperti keluarga sendiri," katanya.

Cik Isrin Farhana ingin menjadi doktor keluarga kerana beliau berasa dapat berinteraksi dengan kanak-kanak dengan baik.

Namun, apabila beliau sedar akan kurangnya doktor dalam bidang geriatrik, beliau berharap menjadi doktor dalam bidang tersebut.

"Akan tetapi, kami masih belum lagi membuat praktikal dalam bidang yang berbeza-beza, saya mungkin akan menemui bidang yang baru bagi saya kelak," kata Cik Isrin Farhana.



CITA-CITA SEJAK MUDA: Sejak berumur tujuh tahun, Encik Sheikh Izzat Zainal-Abidin Bahajaj bercita-cita mahu menjadi seorang doktor.

## Nasib mak cik membuka mata

SHEIKH Izzat Zainal-Abidin Bahajaj berasa gembira dan bersyukur apabila diterima masuk ke Sekolah Perubatan Yong Loo Lin Universiti Nasional Singapura (NUS).

Menurutnya, segala yang diusahakan bukan atas hasil dirinya sendiri sahaja, bahkan ahli keluarga banyak membantunya dalam mencapai impiannya.

Selain itu, guru-gurunya juga banyak membantu dan menasihatinya dalam membuat pilihan bagi kerjayanya kelak.

Bekas pelajar Raffles Institution (Tahun 5-6) itu juga mengatakan bahawa seseorang harus bekerja keras demi mencapai impiannya.

"Pastinya bekerja keras itu penting, mujurlah keadaan sekeliling di sekolah banyak membantu," ujar jejaka berusia 19 tahun itu.

Menurut Encik Sheikh Izzat, beliau dan rakan-rakan daripada Raffles Institution sekurang-kurangnya akan belajar 10 hingga 12 jam setiap hari lebih-lebih lagi apabila musim peperiksaan sudah dekat.

"Mengimbangi masa dalam pelajaran dengan tuntutan lain dalam hal ini adalah penting. Contohnya, ada kalanya saya harus berkorban tidak mengikuti keluarga pergi ke majlis perkahwinan atau jalan Raya tetapi bukannya setiap masa," kata anak sulung dua beradik itu.

Selain itu, beliau juga telah menyertai Kelab Penerbangan Belia Singapura (SYFC) pada Ogos 2014 dan telah menamatkan kursus tersebut pada tahun kelima di Raffles Institution.

Encik Sheikh Izzat berkata beliau mula berminat menjadi doktor ketika berusia tujuh tahun. Arwah mak ciknya menghidapi barah kolorektal, dan beliau telah bertanyakan mak ciknya cara beliau dapat menolongnya.

"Arwah mak cik saya berkata mungkin pada waktu itu saya masih tidak mampu membantunya, namun apabila saya dewasa dengan menjadi doktor saya akan dapat membantu mereka yang senasib dengannya," cerita Encik Sheikh Izzat.

Menurutnya, walaupun kematian memang sesuatu yang tidak dapat dielakkan, selagi terdaya beliau mahu membantu orang sakit dan menyelamatkan nyawa mereka.

"Nasihat saya kepada orang ramai adalah meneruskan minat mereka dengan bersungguh-sungguh."

"Tidak mengapa jika kita masih tidak tahu apa yang ingin kita ceburi, namun usaha dan kerja keras itu penting," katanya lagi.